

Ն. Ս. Օ. Տ. Տ. ՊԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍՔԸ ՀԱՆՐԱՊԵՏԱԿԱՆ ՄԱՂԹԱՆՔԻ ԱՌԻԹՈՎ

(Սուրբ Գայանե վանք, սեպտեմբերի 21, 2023 թ.)

Սիրելի՛ բարեպաշտ ժողովուրդ,

Այսօր համախմբվել ենք սրբազան այս կամարների ներքո միասնական աղոթք մատուցելու առ Աստված Հայաստան եւ Արցախ նվիրական մեր հայրենիքի խաղաղության եւ մեր ժողովրդի անվտանգ կյանքի համար:

Հայոց անկախ պետականության վերակերտման երեսուներկուերորդ տարեդարձը դիմավորում ենք մեծ տազնապների ու անհանգստությունների եւ նոր կորուստների ցավի մեջ: Մեր մտքերն ուղղված են հայրենի Արցախ աշխարհին, որտեղ տեւական ահաբեկումներից, բռնաճշումներից եւ ավելի քան ինը ամիսների ամբողջական շրջափակումից հետո Ադրբեջանը ռազմական լայնածավալ գործողություններ վերսկսեց՝ շարունակելով ցեղասպան իր քաղաքականությունը արյունալի ոճրագործություններով:

Մեր ժողովուրդը Արցախում այսօր կանգնած է գոյաբանական սոսկալի սպառնալիքների առջեւ: Հարյուր տարի անց քաղաքակիրթ աշխարհի հայացքի ներքո մեր ժողովուրդը վերստին ճաշակում է դառնությունը ցեղասպանության: Վերստին ազատ ու անկախ կյանքի ու ազգային պատկանելիության համար հայր վճարում է իր կյանքով ու իր արյամբ:

Մենք հրաժարվում ենք հավատալ, որ քսանմեկերորդ դարի աշխարհում շարունակում է գործել ուժի իրավունքը, հրաժարվում ենք հավատալ, որ աշխարհի առաջնորդները չեն կարող միջոցներ գտնել կանխելու համար եղեռնագործությունը Արցախում: Մեր կոչն ենք ուղղում միջազգային կառույցներին, բարեկամ պետությունների ղեկավարներին՝ անհետաձգելի եւ առավել ազդու միջոցներ գործադրելու Ադրբեջանի ցեղասպան գործողությունները կասեցնելու համար: Կոչ ենք ուղղում մեր երկրի իշխանություններին, ազգային կառույցներին, քաղաքական,

հասարակական գործիչներին՝ ամեն ջանք ներդնելու արցախահայությունը նոր պատուհասներից փրկելու համար: Ազգային մեր կյանքում երկպառակությունը, կործանարար անտարբերությունը, քաղաքական ներհակությունները, հասարակական բեկեռացվածության պատճառով համախմբվելու անկարողությունը նորանոր հարվածներ պիտի հասցնեն մեր ազգին եւ հայրենի պետականությանը: Մեզ պետք է միաբանություն՝ փորձությունները հաղթահարելու եւ վերհանելու համար, անդամաճան հայրենանվիրում՝ պետության անվտանգությունն ապահովելու եւ հզորանալու համար, պատասխանատվություն ու բարձր գիտակցություն՝ համազգային ու պետական մեր շահերի պաշտպանության եւ նվիրական իղձերի իրականացման համար:

Արցախի հավատավոր սիրելի զավակներ, Հայրական Մեր օրհնությունն ու աղոթքն ենք բերում ձեզ եւ Մեր զորակցությունը հայտնում Արցախի իշխանություններին: Ծանր պատասխանատվության առջեւ եք կանգնած եւ, ցավոք, միայնակ եք կրում ձեր տառապանաց խաչը: Մեր ցավն ու վիշտն ընդհանուր է, մեր կորուստների եւ հայրենի երկրին հասցված դաժան հարվածների դառնությունն ու տխրությունը ամենքիս սրտերում են: Վճռական այս պահին թող Աստված ապավեն լինի, մխիթարի ու գոտեպնդի ձեզ՝ դիմակայելու նեղություններին ու դժվարություններին, եւ Տիրոջ ողորմությամբ ձեր եւ ձեր զավակների կյանքի ընթացքը լինի անվտանգ ու ապահով: Այս ծանր իրավիճակում, մեր պատմության փոթորկահույզ ժամանակները հաղթահարած մեր նախնյաց օրինակով, հույսով եւ հավատով զինվենք ու զորանանք՝ ըստ սաղմոսերգուի խոսքի. «Եթե նույնիսկ անցնեմ մահվան ստվերների միջով, չեմ վախենա չարից, քանզի դու, Տեր, ինձ հետ ես» (Սաղմ. ԻԲ. 5):

Սիրելի ժողովուրդ ի Հայաստան, Արցախ եւ ի սփյուռս, միասնաբար աղոթք բարձրացնենք առ Երկնավոր Տերը՝ հայցելով, որ Բարձրյալն Աստված խաղաղության իր շնորհները հեղի հայոց աշխարհին, ամուր ու հաստատուն պահի հայոց պետականությունը եւ ազգասիրության ու հայրենասիրության մեջ՝ վճռական ու անսասան մեր ժողովրդին:

Տիրոջ սերը, շնորհը եւ խաղաղությունը թող լինեն մեզ հետ այժմ եւ միշտ. ամէն:

